每週經課朗誦經文(巴克禮台語漢字)2015/02/01

共同經課-1 申命記十八章十五節~二十節

15 耶和華——你的上帝欲對恁中間對恁的兄弟興起先知,親像我,恁著聽趁伊。16 照你 佇何烈聚會的日對耶和華——你上帝一切所求的,講:『莫得互我閣聽見耶和華——我的 上帝的聲,也莫得互我閣看見此個大火,免得我死無。』17 耶和華就對我講:『in 所講 的是好。18 我欲佇 in 兄弟中給 in 興起一個先知,親像你。我欲將我的話下佇伊的嘴; 伊欲將我一切所命令的對 in 講。19 伊託我的名來傳我的話,人若呣聽,我欲辦伊。20 總是先知自專託我的名講我所無命令伊講的話,抑是奉別個上帝的名來講,彼個先知著死。』

共同經課-2 詩篇ーーー篇

1 恁著謳咾耶和華!佇正直人的會中,及公會中,我欲專心感謝耶和華。2 耶和華的所做真大;凡若歡喜伊所做的攏欲查考伊。3 伊所行的是尊貴威嚴;伊的義永永佇啲。4 伊行奇事,互人記念;耶和華有恩惠,有憐憫。5 伊賞賜米糧互敬畏伊的人;伊欲永遠記念伊的約。6 伊將伊大權能的所做顯明佇伊的百姓;將列邦的業賞賜 in。7 伊的手所做是誠實公平;伊的教示攏是確實,8 是永世代堅固者,是照誠實正直設立的。9 伊向伊的百姓施行救贖,伊定著伊的約,直到永遠;伊的名是聖,通驚畏。10 敬畏耶和華是智慧的根本;見若照按呢行的才有聰明。耶和華的名聲直到永遠!

共同經課-3 哥林多前書八章一節~十三節

1 論到祭偶像的物,咱知咱攏有智識。智識會致到自高,若是仁愛會建立德行。2 人若拍算伊有所知,就是伊猶未知照所應該知。3 人若疼上帝,此個人就是互伊所識。4 論到食祭偶像的物,咱知偶像佇世間是無影的,也知上帝獨獨一個,無別個。5 因為雖然有稱做上帝的,或是佇天裡,或是佇地裡,親像有多多上帝,多多主;6 若是咱只有一個上帝,就是父——萬物本對伊;咱也歸佇伊——閻有一個主,耶穌基督——萬物對伊;咱也對伊。7 總是人無攏有此號智識。有的拜偶像慣勢,到今掠彼個祭祀做祭偶像的物來食伊。in 的良心既然軟弱,所以就染著。8 總是食物袂互上帝歡喜咱,無食,咱無虧損,食,咱也無利益。9 獨獨著謹慎,驚了恁此個權做軟茈的人的塞礙。10 因為若有人看見你有智識的,坐桌佇偶像的廟,彼個軟弱的人的良心,豈無對按呢放膽來食祭偶像的物嗎?11 因為,對你的智識彼個軟弱的人沈淪,就是基督替伊死的兄弟。12 恁按呢得罪兄弟,傷著 in 軟弱的良心,就是得罪基督。13 所以,食物若互我的兄弟跋倒,我就永永呣食肉,免得互我的兄弟跋倒。

共同經課-4 馬可福音一章二十一節~二十八節

21 in 入迦百農,耶穌佇安息日入會堂教示人。22 人奇怪伊的教示;因為伊教示人,親像有權的,無親像經學士。23 抵仔會堂內,有一個患著鬼的人。喉叫講:24 「拿撒勒人耶穌,阮及你甚麼干涉?你來欲滅阮嗎?我知你是是誰,就是上帝的聖者。」25 耶穌責備伊講:「你著靜靜!對此人出去。」26 邪神抽惙彼人,大聲叫,就對伊出去。27 眾人攏卬愕,致到相辯論講:「此個是怎樣?是新的教示!伊用權命令邪神,邪神也順趁伊。」28 伊的名聲隨時遍傳加利利的四方。